



11. august 2025

UKA2025/105

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Qinersisartut Inatsisartunut kommunalbestyrelsinullu qinersinermi qinersivimmi sumiiffimmi sumiikkaluartumiluunniit qinersisinnaanngornissaat anguniarlugu suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Siumut)

Tunngavilersuut:

Inatsisartunut qinersinermi Kalaallit Nunaat tamaat ataatsimut qinersiviuvoq. Assinganik kommunalbestyrelsimut qinersinermi kommunit ataasiakkaat ataatsitut qinersiviupput.

Taamaakkaluartoq soorlu Narsami najugaqartoq Qaqortumi qinersisinnaanngilaq. Tamanna atuuppoq Inatsisartunut qinersinermi imaluunniit Kommune Kujallermi kommunalbestyrelsimut qinersinermi.

Inatsisartunut qinersinermi tamanna tunngaveqarpoq Inatsisartunut qinersisarneq pillugu inatsimmi aalajangersagaammat¹², nammineq qinersivimmut qinersiviusumut ornigulluni qinersisoqassammat, innuttaasup nalunaarsorsimaffianut qaninnerpaasumut tamanna pissalluni.

Naak Inatsisartut inatsisaani, qinersisartut kommunimi nalunaarsorsimaffigisaminni sumiluunniit qinersinissaminnut namminneq aalajangiisinnaanerat pillugu Naalakkersuisut aalajangersaasinnaagaluartut³, pisinnaatitaaffik taanna maannamut atorneqarsimanngilaq. Aalajangersagaq taanna atorneqaraluarpalluunniit, qinersisartut qinersiviup iluani sumiluunniit qinersisinnaanissaat aamma pisinnaasanngikkaluarpog – tassa nunatta iluani sumiikkaluaraanniluunniit.

Kommunalbestyrelsinut qinersinermi aamma taamaappog, qinersisartoq qinersivimmut allattorsimaffigisamit sanilliullugu qaninnermut ornigulluni qinersiartortussaammat. Tamanna

¹ § 44, imm. 3.

² Inatsisartut inatsisaat nr. 14, 24. November 2020-meersoq.

³ § 44, imm. 6.



aamma Inatsisartut kommuninut qinersisarneq pillugu inatsisaanni piumasaqaatitut inissisimasorinarpoq, nunaqarfinnut ilagiinnullu qinersisarnerit ilanngullugit.

Maanna ukiut 25-t sinnerlugit qaangiupput Kalaallit Nunaat tamakkerlugu ataatsimut qinersivinngormat. Aamma ukiut 15-it sinnerlugit qaangiupput kommunit kattussuunneqarmatali, taamalu kommunimi ataatsimi illoqarfiit allaqalerlutik. Taamaakkaluartoq sulii qinersisarneq pillugu aaqqissuussaq qangatut ilusilik ingerlanneqarpoq, innuttaasut pisinnaatitaaffimminnik atuillutik illoqarfimmi imaluunniit nunaqarfimmi najugarinngisaminni nalunaarsorsimaffiup avataatigut qinersisinnaannatik, tassami taamaallaat illoqarfik nunaqarfilluunniit allattorsimaffigisaq qinersivigineqarsinnaavoq⁴.

Siumut isumaqarpoq pingaaruteqartoq inuiaqatigiinni oqartussaaqataanermut peqataaneq nukittorsarneqassasooq, aamma ullutsinnut naleqquttumik inuiaqatigiit nutaangorsarneqarsimassasut naleqquttumik. Anguniagaasariaqarpoq innuttaasut qinersisinnaatitaasut, Inatsisartunut imaluunniit kommunalbestyrelsinut qinersinermut peqataarusuttut, pisinnaatitaaffimmik annertunerpaamik periarfissinneqarnissaat.

Taamaattumik Siumut siunnersuuteqarpoq, innuttaasut Inatsisartunut kommunalbestyrelsinullu qinersinermi qinersiviup iluani sumiiffimmi sumiluunniit qinersisinnaalernissaat anguniarlugu Naalakkersuisut sulissuteqassasut.

Pisortanut aningaasatigut allaffissornikkullu kingunerisassai:

Aningaasatigut kingunerisassat Namminersorlutik Oqartussanut qanoq sunniuteqarnissaat pillugu, siunnersuutip qanoq piviusunngortinniarneqarnissaa apeqqutaasaaq.

Inatsisartunut qinersinermut tunngatillugu periarfissaasinnaavoq nuna tamakkerlugu atorsinnaasumik elektroniskiusumik qinersisartut pillugit allattorsimaffimmik pilersitsineq, taamaalilluni nunap immikkoortuini sumiluunniit qinersiviit tamaasa periarfissatut iserfigineqarsinnaanngorlugit, qinersivinni ataasiakkaani takusinnaanngorlugu kikkut nuna tamakkerlugu qinersisartutut nalunaarneqarsimanersut, kiisalu nalunaarsorneqarsinnaanngorlugu kikkut qinersinissamut allagartamik peqartut qinersisimanersut. Kommunalbestyrelsinut qinersinermut tunngatillugu periarfissaasinnaavoq elektroniskiusumik assingusumik allattorsimaffimmik pilersitsinissaq, kommunimut pineqartumut taamaallaat atuuttussamik.

Periutsit taamaattut pisariaqartitsissapput IT-kkut aaqqiissutissamik ineriartortitsisoqassasooq, taamaattumillu naatsorsuutigineqarpoq aningaasartuutit annertuut pisariaqartinneqassasut, immaqa millionit arlallit (aaqqissuussineq atoruminartoq aamma sillimaniarnikkut

⁴ Qinersinermi inatsisit marluk periarfissiipput allaganngorlugu qinersinissamut, kisianni allaganngorlugu qinersissutit piffissaq eqqorlugu nassiunneqartariaqarput, nalinginnaasumik allakkat aqqutigalugit qinersinermi ullormi tassani apuussinnaaqqullugit naatsorsuinemullu ilaasinnaaqqullugit.



illersorneqarsinnaasoq). Aningaasartuutit qanoq annertutiginissat siumoortumik naatsorsoruminaassinnaapput, piareersaasiernerillu suliarinerani naatsorsuutigineqarsinnaavoq 500.000 kronit angullugit aningaasartuuteqartoqassasoq.

Nuna tamakkerlugu elektroniskimik aaqqissuussinerup eqqunneqarneranut atatillugu aningaasartuutit annertusinnaasut eqqarsaatigalugit, kaammattuutigerusunnarpoq Naalakkersuisut periarfissanik allanik ujartuissasut. Assersuutigalugu periarfissaasinnaasut makku misissorneqarsinnaapput:

- Qinersisartoq, nammineq najugaqarfigisami allattorsimaffigisamilu avataani qinersiniartoq, qinersivimmi aqutsisumut imaluunniit ikiortimut nalunaaruteqassaaq, kinaanerminik uppersarsassalluni aamma ilisimatitsissutigalugu qinersivik sorleq najugarisaminut allattorsimaffigisaminullu qaninnerpaanersoq.
- Qinersivimmi aqutsisoq imaluunniit ikiorti telefonikkut qinersivimmut pineqartup allattorsimaffigisaanut qinersivimmi aqutsisumut imaluunniit ikiortimut attaveqassaaq uppersarsarlugu, qinersiartortoq qinersivimmi allattorsimaffimmi allattorsimaffimmiittoq aammalu sulit qinersisimanngitsoq.
- Qinersivimmi qinersisartup nalunaarsorsimaffianut qaninnerpaami aqutsisoq imaluunniit ikiorti nalunaarsuissaaq qinersisoq qinersisimasooq, aamma soorlu nalunaarlugu qinersivimmi sumi qinersisartoq qinersisimanersoq.

Aaqqiissutissaaq taamaattoq naatsorsuutigineqarpoq Namminersorlutik Oqartussanut aningaasatigut imaluunniit ingerlatsinermut tunngatillugu annertuumik kinguneqassanngitsoq.

Siunnersuut qanoq ingerlanneqassanersoq apeqqutaatinnagu, pisariaqarpoq inatsisinik allanguinissaaq (Inatsisartunut qinersinissaaq pillugu Inatsisartut inatsisaat aamma Kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit Inatsisartut inatsisaat). Tamatuma saniatigut pisariaqarsinnaavoq nalunaarutit malitsigineqartussat suliarineqarnissaat. Suliarineqarnerinut allaffissornikkut atorneqartussat naatsorsuutigineqarput AC-tut sulinerup ukiut 1-2 naligissagaat.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.